

每週經課朗誦經文(巴克禮漢羅/教羅)2013/01/27

共同經課 - 1

尼西米記八章一節~三節，五節~六節，八節~十節

1 到第七月，以色列人已經 khiā 起 in hiah-ê 城。Hit 時百姓親像一人 lóng 聚集 tī 水門前寬闊 ê 所在，請經學士，Í-su-láh，帶摩西律法 ê 冊來，就是耶和華所 bat 命令以色列 ê。2 七月初一日，祭司 Í-su-láh toà 律法到公會前，或男或女，以及見若聽了會曉得 ê ê 面前。3 Tī 水門前寬闊 ê 所在，tùi 天光到日晝，tī 眾男女 kap hiah-ê 能明白 ê ê 面前讀伊，百姓 àⁿ 耳孔聽律法 ê 冊。5 Í-su-láh khiā tī 眾百姓 ê 頂面，tī 眾百姓 ê 目矚前掀開 chit 本冊；伊一下掀開，眾百姓就 lóng 起來 khiā。6 Í-su-láh o-ló 耶和華至大 ê 上帝；眾百姓 lóng kiáh 起手，應講，A-bēng，A-bēng，就 àⁿ 頭，面 òng 地，敬拜耶和華。8 In 讀上帝律法 ê 冊到明白 koh 開拆 hit-ê 意思，hō 百姓明白所讀 ê。9 總督尼希米，kap 做祭司 ê 經學士 Í-su-láh，kap 教示百姓 ê 利未人，對眾百姓講，今 á 日是耶和華 lín 上帝 ê 聖日；m̄-thang 悲哀啼哭。因為眾百姓聽見律法 ê 話 lóng 啼哭。10 伊 koh kā in 講，去 ah，lín 去食肥 ê 物，lim 甜 ê 味；無備辦物 ê 人，tiòh 分 hō伊；因為今 á 日是咱 ê 主 ê 聖日；lín m̄-thang 憂悶，因為 tùi 耶和華得 tiòh ê 歡喜是 lín ê 能力。

共同經課 - 2

詩篇十九篇

1 大衛 ê 詩；交 hō 樂官。1) Chiah-ê 天講起上帝 ê 榮光，穹蒼報揚伊 ê 手所做 ê。2 Chit 日 tùi hit 日發出言語，Chit 暝 tùi hit 暝傳出知識。3 無言無語；In ê 聲無 thang 聽見。4 In ê 準繩遍 tī 天下，In ê 言語到 tī 地極。上帝 tī in 中間為 tiòh 日頭安置帳房。5 日頭親像新 kiáⁿ 婿出伊 ê 房，亦親像猛勇 ê 人歡喜走伊 ê 路。6 伊 tùi 天 ê chit-pēng 出，Sèh 到天 ê hit-pēng；無一項物 khng 密，無得 tiòh 伊 ê 熱氣。7 耶和華 ê 律法齊全，能 hō 人 ê 心神活起來；耶和華 ê 干證確實，能 hō 人有智慧。8 耶和華 ê 教示正直，能 hō 人 ê 心歡喜；耶和華 ê 命令清潔，能 hō 人 ê 目矚光明。9 敬畏耶和華 ê 道理是清氣，永遠存在；耶和華 ê 判斷真實，一概是公義。10 比金，比 choē-choē 好金，kiah thang 欣慕；比蜜，比蜂房滴落來 ê 蜜 kiah 甜。11 Koh 你 ê 奴僕 tùi chiah-ê 受警戒；守 chiah-ê 有大賞賜。12 Chī-chūi 會知伊 ê 失錯 ah？求你除去我暗靜 ê 過失。13 求你阻止你 ê 奴僕，無故意犯罪；M̄准 hit-ê 罪惡管轄我；我就完全，免犯大罪。14 耶和華我 ê 石磬，救贖我 ê 主 ah；願我 ê 嘴所講 ê，心所想 ê，tī 你 ê 面前得 tiòh 接納。

共同經課 - 3

哥林多前書十二章十二節~三十一 a 節

12 因為親像身軀是一個，也有 choē-choē 體，koh 身軀 ê 體雖然 choē，lóng 是一個身軀；基督也是 án-ni。13 因為咱眾人，無論是猶太，á 是希利尼，做奴才 ê á 是自由 ê，lóng bat 受洗禮 tī 一個神，來屬 tī 一個身軀，也 lóng 總 bat lim 一個神。14 因為身軀 m̄ 是一體，是 choē-choē 體。15 設使腳若講，我因為 m̄ 是手，我無屬身軀；伊 m̄ 是為 tiòh án-ni 就無屬 tī 身軀。16 設使耳 á 若講，我因為 m̄ 是目矚，我無屬 tī 身軀；伊 m̄ 是為 tiòh án-ni 就無屬 tī 身軀。17 設使 thong 身軀是目矚，tùi tá-lòh 能聽？若 lóng 是耳 á，tùi tá-lòh 能 phīⁿ？18 但是上帝照伊 ê 所 ài，將 chiah-ê 體 sùi-ê 安排 tī 身軀。19 若百體 lóng siāng 一款，就身軀 tī tá-lòh？20 總是 taⁿ 體是 choē-choē，也身軀是一個。21 目矚 boē 會對手講，我無欠用你；頭殼也 boē 會對腳講，我無欠用 lín。22 M̄-nā án-ni，身軀 chiah-ê 體，看做 khah 軟 chiáⁿ ê koh-khah boē 無得。23 Koh 咱看做身軀 khah 無貴氣 ê 體，咱就裝飾 hō in khah 尊貴；也 khah 無文雅 ê，咱 hō in koh-khah 文雅。24 因為咱文雅 ê 體無所欠缺。獨獨上帝調和身軀；tī 有欠缺 ê，益發 hō伊尊貴；25 免得身軀無相合是 beh hō 百體平平相眷顧。26 若一體受苦，百體同受苦；一體受榮光，百體同快樂。27 Lín chiah-ê 是基督 ê 身軀，sùi-ê 是做體。28 上帝所設 tī 教會 ê，一是使徒，二是先知，三是教師，koh 有行權能 ê，koh 有醫病 ê 恩賜，幫贊 ê，治理 ê，講 tak 樣 ê 音語 ê。29 眾人 kiám lóng 是使徒 mah？lóng 是先知 mah？lóng 是教師 mah？lóng 行權能 mah？30 lóng 有醫病 ê 恩賜 mah？lóng 會講 tak 樣 ê 音語 mah？lóng 會翻譯 mah？31 Lín tiòh 切切欣慕 hiah-ê khah 大 ê 恩賜。

共同經課 - 4

路加福音四章十四節~二十一節

14 耶穌 tī 聖神 ê 權能 tò-tng 去加利利。伊 ê 名聲遍傳 tī 四圍 ê 地方。15 伊 tī in ê 會堂教示，hō 眾人 o-ló 伊。16 耶穌到拿撒勒，就是伊長成 ê 所在；tī 安歇日照伊平常 ê 法度日會堂，就 khiā-teh beh 讀。17 有人將先知以賽亞 ê 冊 hō伊；伊就掀開，chhē-tiòh hit 所在，記講，18 主 ê 神臨到我，因為伊用油抹我，hō 我傳福音 hō sòng-hiong 人；伊有差我 kā 受掠 ê 人講，in 會得 tháu 放，Kā chhiⁿ-mī ê 講，in 會得 tiòh koh 光，來 tháu 放受壓制 ê 人，19 宣傳主歡喜 ê 年。20 耶穌 háp 冊，還執事，就坐 teh；tī 會堂 ê 眾人 lóng 注目看伊。21 伊就開嘴對 in 講，Chit-ê 聖經 ê 應驗，lín 今 á 日有聽見 lah。